

Uunga siunnersuut: Meeqqat tapersorsorneqarnissaannut Inatsisartut inatsisaat nr. xx, xx xxx 2017-imeersoq

(Ilaqutariinnermut Naligiissitaanermut, Isumaginninnermut Inatsisinillu Atuutsitsinnermut Naalakkersuisoq)

Saqqummiussissut

(Ilaqutariinnermut Naligiissitaanermut, Isumaginninnermut Inatsisinillu Atuutsitsinnermut Naalakkersuisoq)

Siullermeerinnineq

Meeqqat tapersorsorneqarnissaannut Inatsisartut inatsisissaattut siunnersuut Naalakkersuisut sinnerlugit matumuuna saqqummiutissavara.

Meeqqanut inuusuttunullu tunngassuteqartunut annertuumik pisariaqartumillu iliuseqartoqarnissaa pisariaqartinneqartoq tamanit ilisimaneqarpoq. Piffissami kingullermi nakkutilliiartorluni tikeraarternerit amerlasuut aammalu MIO-p nalunaarusiaata tusagassiorfinit innersuussutigineqarluartartup tamassumunnga takussutissaavoq.

Inatsisartut inatsisissaattut siunnersuut saqqummiunneqartoq meeqqat illersussallugit ikiorsissallugillu, aammalu inuusuttut ikiorserneqareernerup kingornatigut malinnaavigineqartut (tassa efterværn) ikiussallugit atorneqassaaq. Meeqqat aarlerinartorsortut inuiaqatigiinniillu tapersorsorneqarnissamik pisariaqartitsisut inatsisissatut siunnersuutikkut immikkut ukkatarineqassapput. Tapersersuineq ingerlanneqartassaaq meeqqap pisariaqartitaanik tamakkiisumik nalilersuereernermik aallaaveqartumik. Aaqqiissuteqarnermi ilaqutariit ilanngunneqartassapput, kommunalbestyrelsilu siamasissumik tapersersuinissamik neqerooruteqarnissaminut periarfissaqartinneqassaaq.

Meeqqat pisinnaatitaaffiisa nukittorsarnissaat meeqqanullu tunngassuteqartuni isumaginninnikkut ersarissumik malunnaateqarluartumillu inatsiseqalernissaq inatsisissatut siunnersuummi siunertarineqarpoq. Naalagaaffiit Peqatigiit meeqqat pisinnaatitaaffii pillugit isumaqatigiissutaat - aamma Børnekonvention-imik taaneqartartoq, tassani siunertarineqarluni meeqqat pisinnaatitaaffiisa siuarsarneqarnissaat, aammalu Haager-imi isumaqatigiissut 19. oktober 1996-meersoq - Haagerbørnebeskyttelseskonvention-imik taaneqartartoq matumani meeraq illersussassallugu siunertarineqartoq tunulequtaralugit inatsisissatut siunnersuut suliarineqarpoq.

Meeqqat pisinnaatitaaffiisa nukittorsarnissaat aammalu meeqqat tamarmik Nunatsinni alliaartortut pitsaasumik toqqiissimasumillu alliaartornerminni sinaakkuteqarnissaat, aammalu namminneq nukissaminnik pitsaanerpaamik atuilluarnermikkut ineriartornissaminnik periarfissinneqassasut politikikkut ataatsimoorussamik kissaataamat siunnersuusiordermi tunuliaqutaavoq. Meeqqat pillugit isumaginnittoqarnikkut isumannaallisaanerit matumani inatsisissatut siunnersuutikkut nukittunerulissapput, meeqqallu pisortat ingerlatsinerannut

tatiginninnerat qulakkeerneqassalluni. Inatsisissatut siunnersuut tapersiinnissanut periarfissanik nutaanik amerlanerusunillu periarfissiivoq, pisortallu ingerlatsivii, minnerunngitsumillu kommunit namminneq aalajangiinissaminut kiffaangissuseqarnerulissallutik.

Kommunalbestyrelsi ingerlatsinermi sumiiffigisami akisussaasutut oqartussaasutut arlalinnik sakkussaqaalissaaq, nammineerluni sulissuteqarnikkut aamma ujartuinerusumik meeqqanut inuusuttunullu tapersiinnissamik neqerooruteqarsinnaalersillugu aammalu ajornartorsiutigineqartut aqqinneqarnissaat taamattaarlu pinaveersaartitsineq eqqarsaatigalugit, taamaaliornikkut meeqqat alliartornerminni atugassarititaat pitsaasumik qulakkeerneqassammat.

Taamattaaq ingerlatsiveqarfimmi ersarissumik akisussaaffeqarnerup inissisimanera aalajangersarneqarpoq. Kommunit sumiiffigisami pitsaanerpaamik meeqqanut ataasiakkaanut tapersiinnissamik kiffaangissuseqarnerusumik neqerooruteqarsinnaalissaaq, kisiannili aamma malitsigisaanik pisussaaffilerneqassalluni. Meeqqat pisinnaatitaaffiisa aamma ingerlatsiviit pisinnaatitaaffiisa pisussaaffiisalu ersarinnerulersinneqarnerisigut ilaatigut siunnersuut isumaginnittoqarnikkut ingerlatsivimmi nutaaliaasumi pikkorissuseqartumillu sunniuteqarluartumik sakkussaqaarnissaa qulakkeerneqassaaq.

Meeqqat sunniuteqarluartumik taperserneqarneratigut inuiaqatigiinni aamma atugassarititigut assigiinngissutsit naligiinnerulernissaat atugarisatigullu kingornuttagaasa pitsaanerulernissaat anguneqassaaq.

Naalagaaffiit Peqatigiit Meeqqat pillugit Isumaqaatigiissutaat arlaqartut inatsisissatut siunnersuutikkut atulersinneqarneri naammassineqassapput, assersuutigalugu meeqqat namminneq pillugit suliarineqartuni tusarneqarnissaminut pisinnaatitaaffeqarnerat. Siunnersuutikkuttaaq meeqqat innuttaasutut nammineersinnaasutut isigineqalissapput, soorlu uagut inersimasuusugut inuiaqatigiinni pisinnaatitaaffeqarnigut assigalugit. Naligiinneq aamma nammineq pisinnaatitaaffeqarneq siunnersuummi nukittorsarneqarput, assersuutigalugu meeqqap nammineq pineqartilluni suliami naammagittaalliorsinnaalerneratigut.

Siunnersuut aamma Naalakkersuisunut pisussaaffiliinermik imaqarpoq, ilaatigut isumaginnittoqarnikkut suliaqarnermi kommunit sakkussaannik suliaqarnissamik aammalu meeqqat pillugit suliaqarnermi ersarinnerusunik aalajangersagaliornissamik. Tamassuma siunertaraa kommunini sullissinerup pitsaassusaata kivinneqarnissaanut kajumissuseqarnerulernissaq.

Akilerartarnermut Atugarissaarnermullu Isumalioqatigiissitap isumaliutissiissutaata malitseqartinneqarnissaanut Nassuiaammi, UKA 2011/107 innersuussutaasut siunnersuummi malinneqarput, siusinaartumik iliuseqartarnissaq aammalu suliassaqaarnikkut akimortumik suleqatigiittarnissaq salliutillugit meeqqanut inuusuttunullu politikkeqarnermi periusissatut pingaartinneqassammata. Siusinaartumik iliuseqartarnissaq qitiutillugu aningaasaqaarnikkut ineriartornikkullu nammineq atatissinnaasumik ineriartornissamut qitiusumik

nammatsisuussaaq soorlu tamanna Naalakkersuisut Atasinnaassutsimut Ineriartornermullu Pilersaarutaanni (Holdbarheds- og Vækstplan) piumasaqaataasoq.

Aalajangersakkanik anguniagassanillu ersarissunik suliaqarnikkut nassuiaammi innersuussutigineqartut siunnersuummi malinneqarnissaat anguniarneqarpoq. Tamassuma saniatigut kommunit soqutigisaqatigiillu kattuffiisa meeqqanut tunngassuteqartuni kissaataat arlalissuit Naalakkersuisunit tiguneqarsimasut malinneqarput. 2014-imi Naalakkersuisut meeqqanut tapersersuinissaaq pillugu inatsisissatut siunnersuummik saqqummiussaqrput, akuerineqanngitsumilli. Maannalu pissutsit imaalersimapput, meeqqat pisinnaatitaaffiisa pitsanngorsarneqarnissaat pisariaqarluinnalersimalluni. Meeqqat toqqissisimasumik ineriartornissaannut atugassarititaasunillu pilersitsinissamik inatsisissatut siunnersuut annertuumik isumaqarpoq, kisimiillunili napatitsisinnaanngilaq. Meeqqanut inuusuttunullu aarlerinartorsiortunut sanilliullugu ataatsimoorussaasumik ukkatarinnilluartumillu pilersaarusiortarnernut allanullu suliniuteqartarnernut pioreersunut naammaqqutaasussatut siunnersuut ilaatinneqassaaq. Tamatumunnga siamasissumik tapersersuisoqarnissaanut Naalakkersuisut neriuuteqarput.

Taamatut oqaaseqarlunga siunnersuut Inatsisartunut oqaluuserineqarnissaa tunniuppara.